



**EMBARGO:** Tidak boleh dicetak atau disiarkan di mana-mana platform media sosial sebelum jam 10.00 pagi, 22 Januari 2026

Untuk Terbitan Media  
22 Januari 2026

## SIARAN MEDIA

### PERKESO, SPRM BONGKAR SINDIKET PEMALSUAN TUNTUTAN FAEDAH PENCEN ILAT MELALUI 'OPS STROKE'

**KUALA LUMPUR:** Pertubuhan Keselamatan Sosial (PERKESO) menegaskan komitmen berterusan dalam melindungi dana caruman pekerja melalui kerjasama strategik bersama Suruhanjaya Pencegahan Rasuah Malaysia (SPRM) bagi membanteras kegiatan pemalsuan tuntutan faedah.

Ketua Pegawai Eksekutif Kumpulan PERKESO, Dato' Sri Dr. Mohammed Azman Aziz Mohammed, ketika menyuarakan pendirian itu berkata operasi yang dikenali sebagai 'Ops Stroke' adalah hasil kerjasama erat antara dua agensi berkenaan sejak 3 September, tahun lalu.

"Menerusi hasil risikan dan siasatan, enam individu berjaya diberkas, melibatkan Orang Berinsurans (OB) dan dalang yang dipercayai bersekongkol dalam pemalsuan dokumen bagi tujuan tuntutan Faedah Pencen Ilat, bawah Akta Keselamatan Sosial Pekerja 1969 (Akta 4).

"Siasatan awal mendapati jumlah faedah yang dibayar akibat tuntutan palsu ini mencecah kira-kira **RM220,000**. Bagaimanapun, tindakan pantas PERKESO berjaya menyekat unjuran kerugian yang lebih besar.

"Jika sindiket pemalsuan dokumen ini tidak ditangani dengan segera, nilai kerugian dianggarkan menjangkau **RM3.78 juta**," katanya menerusi kenyataan, hari ini.

Dr. Mohammed Azman berkata PERKESO tidak akan berkompromi dengan mana-mana pihak yang cuba menggugat integriti keselamatan sosial negara demi kepentingan peribadi.

"Semua permohonan tuntutan PERKESO adalah **percuma** dan pencarium hanya perlu berurusan terus dengan PERKESO bagi mengelakkan mereka dimanipulasi ejen atau sindiket.

"PERKESO sentiasa melakukan pemantauan bagi memastikan tiada unsur manipulasi atau penipuan berlaku dan menyeru pencarium untuk sentiasa berlaku jujur serta amanah dalam mengemukakan sebarang tuntutan.

“Sebarang cubaan untuk mengemukakan dokumen palsu bukan sahaja akan menyebabkan tuntutan ditolak, malah individu terlibat boleh dikenakan tindakan undang-undang,” tegasnya.

Mengulas kesan kegiatan tidak bertanggungjawab itu, Dr. Mohammed Azman berkata aktiviti sindiket ini bukan sekadar mengakibatkan kerugian kewangan secara langsung, malah menjadi ancaman serius terhadap kemampuan dana keselamatan sosial negara dalam jangka panjang.

Katanya, ketirisan dana akibat tuntutan palsu ini berisiko menjejaskan keupayaan PERKESO untuk menyalurkan bantuan kepada pencarum yang benar-benar layak dan memerlukan perlindungan.

“Tindakan sindiket yang memanipulasi fakta demi keuntungan peribadi ini mampu mencetuskan **normalisasi penipuan** dalam kalangan masyarakat.

“Sekiranya dibiarkan berleluasa tanpa usaha pembendungan, lebih ramai pencarum dikhuatiri akan terpedaya dengan taktik ejen yang menjanjikan kelulusan segera sehingga akhirnya memerangkap pencarum dalam kancap jenaya,” katanya.

**##TAMAT##**

### **Mengenai LINDUNG**

**LINDUNG** ialah penjenamaan semula skim perlindungan keselamatan sosial PERKESO yang dilancarkan pada 22 Ogos 2025 sebagai langkah strategik memperkukuh peranan dalam melindungi rakyat. Pendekatan ini lebih segar, inklusif, mudah diingat dan berimpak tinggi bagi menyampaikan mesej perlindungan sosial secara meluas dan berkesan. Ia bertujuan memperluas capaian, meningkatkan kesedaran serta memperkukuh kepercayaan rakyat terhadap PERKESO sebagai pelindung utama keselamatan sosial. Di bawah penjenamaan ini, Akta 4 dikenali sebagai **LINDUNG PEKERJA**, Akta 800 sebagai **LINDUNG KERJAYA**, Akta 789 (SKSPS) sebagai **LINDUNG KENDIRI**, dan Akta 838 (SKSSR) sebagai **LINDUNG KASIH**. Maklumat lanjut di [www.perkeso.gov.my](http://www.perkeso.gov.my).

**Dikeluarkan oleh:**

**Bahagian Komunikasi dan Hal Ehwal Korporat**

**22 Januari 2026**

**Untuk pertanyaan media, sila hubungi**

**Ikhlil Fatimah Kamal Redzuan**

**+6019-3273193**

[fatimah.redzuan@perkeso.gov.my](mailto:fatimah.redzuan@perkeso.gov.my)

**Ridauddin Daud**

**+6019-3265772**

[ridauddin.daud@perkeso.gov.my](mailto:ridauddin.daud@perkeso.gov.my)